

INUIT ATAQATIGIIT INATSIARTUNI



UKA2021/095

20. oktober 2021

Sofia Geisler

**Naalakkersuisut Kommune Qeqertalimmi aamma Avannaata
Kommuniani campusimik pilersitsinissaq siunertaralugu suliniutit suut
aallartinneqassanersut misissueqqullugit peqquneqarnissaannik
Inatsisartut aalajangiiffigisassatut siunnersuut. Misissuinermi ilaatigut
qulaajarneqassapput, Aasianni GUX-ip pitsaassusaanut aammalu
tiguneqarnissamut toqqammavigisat allannguutaanngitsumik,
Ilulissani GUX-imik pilersitsinissamut suliniutit pisariaqartut.
Misissuineq juli 2022 naatinnagu saqqummiunneqassaaq.**

(Inatsisartunut ilaasortaq Doris Jakobsen Jensen, Siumut)

Siunnersuut qulaani taaneqartup itigartinneqarnissaanik Naalakkersuisut
innersuussinerat, tamatumunngalu akissuteqaammi
tunngavilersuutigineqartut, Inuit Ataqatigiinniit tusaatissatut tiguvarput.

Inuit Ataqatigiinniilli isumaqarput allanngunngilaq, tassalu Kommune
Qeqertalimmi kiisalu Avannaata Kommuneani ilinniartitaanikkut
pisariaqartinneqartut periarfissallu immikkut samminissaat
pisariaqarluinnartoq. Pingaartumillu Avannaata Kommuneani illoqarfittut
qitiusumi ilinniartitaanikkut pisariaqartinneqartut suunerat nalilersussallugu
pisariaqarluinnartoq isumaqarpugut, ilinniartitaanerit ataatsimut isigalugit,
immikkulli assersuutigalugu silap pissusaa eqqarsaatigalugu. Taassumap
saniatigut Qeqertarsuup Tunua, pingaartumillu Ilulissat tassaapput
takornariaqarfissuit ilaat. Innuttaasut takornariartitsinermut tunngatillugu
ilisimasaat qitiulluinnartariaqarput, ilinniartitaanikkullu ineriartortitsinermi
tamanna ilaalluinnartariaqarpoq.

INUIT ATAQATIGIIT INATSISARTUNI



Aasiannut, taamalu aamma Kommune Qeqertalimmut, tunngatillugu imm. 107 innersuussutigissavarput, taannalu 21. Oktober 2021 oqaluuserineqalerpat Naalakkersuisut akissummini innersuussutigisaat periarfissatsialattut isigivarput.

Ataatsimiititaliat susassaqtut aqqutigalugit Naalakkersuisullu qanimut suleqatigalugit ilinniartitaanikkut tunngasunik isumannik ineriartortitsinermut periarfissiuussinermullu Inuit Ataqatigiit peqataassaagut. Ilinniartitaaneq pingaaruteqaqaaq, sulili pingaaruteqarneruvoq suliap taassuma imminut ataqatigiittumik, nunalu tamaat isigalugu pilersaarusiorsinnaaneq.

Taamaattumik immikkoortup uuma itigartinneqarnissaa Naalakkersuisut innersuussutigigaluaaraat Inuit Ataqatigiinniit innersuussutigissavarput

Ilinniartitaanermut, Kultureqarnermut, Timersornermut Ilageeqanermullu Ataatsimiititaliamut ingerlaqqissasoq. Pingaaruteqarpoq sammisap sukumiisumik ataatsimiititaliami oqaluusereqqaarnissaa appassaaneernissanut aalajangivinnissaq pitinnagu.